

# Ontmoeting 1

## Intertestamentêre tyd

Kinders leer dat Jesus se koms lank gelede voorspel is

**Teks:** Lukas 2; Maleagi 3; Miga 5:1; Jesaja 9:6 / 7:14; Sagaria 9:9

### Hulpmiddels:

- Toiletrol vir elke kind en versierings
- 4 Besempoppe (of trek 4 kinders so aan):
  - h Baling wat terugkeer – vaal en eenvoudig
  - Een wat herinner aan die Griekse tydperk
  - Een met klere stukkend geskeur – asof hy/sy uit h geveg kom
  - Een wat armoedig aangetrek is – moet wys hy/sy kry swaar

(Jy kan 1 besempop gebruik en net elke keer sy voorkoms verander.)

- h Boodskap in die vorm van h boekrol waarin die volgende verse staan: Miga 5:1; Jesaja 7:14; Jesaja 9:1,5 en 6



**Welkom**

### Speel “mens tot mens”:

Die kinders verdeel in pare. Roep uit: “Duim teen duim”, “Knie teen knie”, “Rug teen rug”. Kinders voer die opdrag uit soos dit uitgeroep word. Roep dan: “Mens tot mens” – Almal ruil maats.

Herhaal dit h paar keer. Vra met elke ruiling wat die maatjie se naam is en waar hy/sy skoolgaan.



**Wyding**

### Stilword-ritueel:

Gebed: Die leier bid elke keer h sinnetjie en die groep herhaal dit saam:

Dankie Heer, vir hierdie dag.

Dankie dat die Bybel vir my sê dat U my liefhet.

Dankie dat U mens geword en vir ons die pad kom loop het.

Help ons om U ook te volg..

...soos ons nou in die gebed ons leier gevolg het.

Amen



## Woord

Inleiding: Hier is h man wat vir ons nuus bring. Hy is h Israeliet, maar hy is nie in Israel gebore nie. Hy was in ballingskap in Babel. Kom ons hoor wat vertel hy:

*(Besempop wat soos h arm man aangetrek is. Hy het die boekrol by hom.)*

“My hart is baie bly, want ek is vry. Ek het my lewe lank gewag vir die dag dat ons kon terugkeer na ons eie land. Nou is ons hier in Jerusalem en die muur en die tempel is weer opgebou. Ons het ons les geleer en niemand in Israel aanbid nou afgode nie. Ons het ook nie h koning nie. Die hoëpriester is verantwoordelik vir groot besluite. Dit was koning Kores van Persië wat ons gehelp het om terug te kom na ons eie land. Die Perse het die grote Babel ingeneem en ons gehelp om ons tempel te versorg. Ons voel nou veilig. Ek sien uit daarna dat my kinders en kleinkinders hier kan grootword en van God kan leer.”

*(Besempop met “Griekse kleed”. Hy hou die boekrol ook vas.)*

Ons het nog h besoeker. Kom ons hoor wat hy vertel:

“Ai, maar die wêreld het darem vreeslik verander vandat ek h kind was. Dis nou 200 jaar gelede dat my voorouers uit Babel teruggekeer het. Ek hoor my agter-agter oupagrootjie was netnou hier. Hy sou julle vertel het van die goeie dae toe hulle die muur en die tempel reggemaak het. Intussen het daar baie dinge in die wêreld gebeur. Alexander die Grote – die Griek van Masedonië – het die Perse oorwin en hy regeer nou oor al die lande wat ons ken. Dit het so erg geword dat ons glad nie eers meer ons eie taal praat nie. Almal praat nou Grieks en die Grieke het hulle gode oral ingebring. Selfs in ons tempel. Ons mag nie meer vir God aanbid nie. Hulle doen net wat hulle wil in ons tempel. Wat my die seerste maak, is dat my eie mense die Grieke se gewoontes so interessant vind dat hulle nie meer vir hulle eie geloof, taal of kultuur omgee nie. Wat gaan tog van ons word? Wat van al die beloftes van die profete? Sal daar vir ons h Verlosser kom? O, Here help ons.”

*(Besempop, die “Makabeër”, lyk of hy uit h geveg kom. Hy het nou die boekrol.)*

“Ons kon dit net nie meer uithou nie. Ons het genoeg gehad van die Grieke wat in ons tempel maak net wat hulle wil. Ons het saamgestaan en in opstand gekom. Dit was h lang stryd en baie gevegte, maar na 20 jaar het ons gewen. Die tempel is nou weer onder ons beheer en ons het h nuwe altaar gebou. Ons mense praat nog steeds Grieks en die boeke van Moses en die profete is in Grieks vertaal. Ons kan uiteindelik na meer as 500 jaar onself regeer. Ons eie priesters regeer die land. Ons het nie h koning nie. Nou wag ons net dat die profesieë van die Messias moet waar word.”

*(Besempop wat armoedig aangetrek is.)*

“Dink julle dit gaan goed in my land? Moenie glo nie. Vir 200 jaar het dit heel goed gegaan, maar daardie tyd is verby. Die Romeine het sterker geword as al die ander volke en ons is ook nou onder hulle beheer. Hulle het h kamma koning vir ons aangestel. Sy naam is Herodes, maar eintlik doen die Romeine net wat hulle wil. Ons is soos slawe in ons eie land. Ons het net een hoop en dit is dat die Messias moet kom. Dit is wat die profete voorspel het...” *(Lees die verse in die boekrol.)*

Vertel vir die kinders dat na al hierdie jare alles gereed was dat Jesus kon kom en die boodskap in die wêreld kon versprei. Die Griekse taal is oral verstaan, die Romeine het goeie paaie gebou waarmee mense tussen lande kon beweeg en die Romeinse regstelsel was so goed ontwikkel dat ons vandag nog daarvan gebruik maak.

Lees Lukas 2 – Augustus die Romein regeer. Hy laat almal inskryf in hul eie geboorte dorpe.

- In hierdie tyd is Jesus gebore
- Hy is die Redder vir alle volke
- Alles is gereed vir die uitdra van die boodskap van sy verlossingswerk (o.a. paaie, taal, regstelsel, ens.)

Kinders kry tyd om oor die verhaal te dink:

1. Ek wonder wat was vir jou interessant / mooi in die verhaal.
2. Ek wonder watter deel van die verhaal sal jy onthou.
3. Ek wonder in watter van hierdie tye sou jy wou leef.
4. Ek wonder watter van God se beloftes is vir jou spesiaal.



## Werskaf

- Teken wat jy kan onthou uit die vertelling en gaan vertel dit vir iemand by die huis.
- Elke kind kry 'n toiletrol met die profesieë wat in die boekrol geskryf was. Vou die boekrol daarin en versier die toiletrol.
- Hou 'n rollespel met die besempoppe.

## Sluit af met die seënbede

Hou almal hande vas in 'n kring. Die kinders herhaal agter die aanbieder aan:

Dankie, Heer, vir die Bybel voor ons; dankie, Heer, vir die maatjies langs ons; dankie, Heer, vir die liefde tussen ons. Amen.

Profesieë om in boekrol te sit:

Miga 5: 1: Maar jy, Betlehem–Efrata, jy is klein onder die families in Juda, maar uit jou sal daar iemand kom wat aan My behoort en hy sal in Israel regeer. Sy begin lê ver terug, in die gryse verlede!

Jesaja 7:14: Die Here sal daarom self vir julle 'n teken gee: 'n Jong vrou sal swanger word en 'n seun in die wêreld bring en sy sal hom Immanuel noem.

Jesaja 9: 1,5 en 6: Die volk wat in donkerte geleef het, het 'n groot lig gesien, oor die wat in die donker land was, het 'n lig geskyn.

Vir ons is 'n Seun gebore, aan ons is 'n Seun gegee; Hy sal heers, en Hy sal genoem word: Wonderbare Raadsman, Magtige God, Ewige Vader, Vredevors.

Sy heerskappy sal uitbrei, en Hy sal vir altyd vrede en voorspoed bring. Hy sal op die troon van Dawid sit en oor sy koninkryk regeer. Hy sal die koninkryk vestig en in stand hou deur reg en geregtigheid, van nou af en vir altyd. Daarvoor sal die onverdeelde trou van die Here die Almagtige sorg.